

Mid-Day Dogri News Bulletin, 09th March 2025

समै — 12:25

<><><><><><>

Home Secretary Review Meet

केन्द्रीय गृह सचिव गोविंद मोहन होरें अज्ज जम्मू च इक उच्च स्तह दी सुरक्षा जायजा बैठक ला'रदे न। ओह नीम फौजी बलें ते खुफिया अजेंसिएं दे आला अधिकारिएं दी बैठक दी अध्यक्षता करगन। इस बैठक दा मकसद खित्ते दी सुरक्षा स्थिति दा आंकलन करना ऐ। एह्दे च पुलस ते सुरक्षा कन्नै जुड़े दे आला अफसर हिस्सा लेंगन। अना औहदा संभालने मगरा ओह जम्मू खित्ते दी पैहली सुरक्षा जायजा बैठक ला'रदे न। बैठक च मेद ऐ जे सुरक्षा हालात ते सरबन्धी रणनीति पर बचार बमर्श होग।

<><><><><><>

National Lok Adalat

जम्मू कश्मीर च कल 2025 दी पंचैती राष्ट्रीय लोक अदालत दा सरिस्ता कीता गेआ। एहदा मकसद तौले किफायती ते विवादें दा आपसी सैहमति जां दौनें पक्खें बश्कार सलाह सफाई राएं हल कड्डना ऐ। एह् अदालत जम्मू ते कश्मीर ते लद्दाख हाई कोर्ट दे मुख् न्यायधीश न्यायमूर्ति ताशी रबस्तन हुंदी सरपरस्ती च होई। कुल इक लक्ख 99 जहार 853 मामलें इक सौ 65 बैच आस्सेआ लैते गे। इक लक्ख 88 जहार 422 दा नबेड़ा कीता गेआ। कुल 39 करोड़ 4 लक्ख 49 जहार 391 रपे बतौर मुआवजा दित्ता गेआ। इंदे च एक्सीडेंट क्लेमस, सिविल, अपराधिकें ते श्रम मजदूरी सरबन्धी होर दुए मामले शामिल हे। दूई लोक अदालत दा सरिस्ता 10 मई 2025 गी कीता जाग। विशेष उपभोक्ता लोक अदालत दा आयोजन 26 अप्रैल 2025 गी कीता जाग।

<><><><><><>

CS UTLBC Meet

मुख् सचिव अटल डुल्लू होरें केन्द्र शासत प्रदेश सतह दी बैंकर्स कमेटी दी 15मीं बैठक दी अध्यक्षता कीती। इस दरान उनें माली ब'रे 2024–25 दरान बैंक दी कारकरदगी दा जायजा लैता। खास करी रोजगार सृजन आली स्कीमें दी अमलावरी ते इंदे तैह्त् कीते गेदे कम्में दा उनें बैंकें गी आखेआ जे ओ 30 जून थमां पैहले-पैहले उनें ग्रामीण इलाकें जित्थें बैंक

सरबंधी सहूलतां नेई ऐन उत्थें बैंकिंग दियां सुविधा उपलब्ध करोआन। उनें महिलाएं गी सशक्त बनाने लेई जेएंडके बैंक ललदीद स्त्री शक्ति लोन योजना दी बी शुरूआत कीती।

<><><><><><>

Youth Exchange Programme

जम्मू कश्मीर दी कला संस्कृति ते भाषा सरबंधी अकादमी आस्सेआ नेहरू युवा केन्द्र संस्थान दे सैहयोग कन्नै के.एल.सहगल हाल च लोक संगीत ते नृत्य कार्यक्रम दा सरिस्ता कीता गेआ। एहदा मकसद संस्कृतिक बन्न सबन्नता ते युवा सशक्तिकरण गी बढ़ावा देना हा। 3 रोजा अंतर राज्य सतह दे यूथ एक्चेंज प्रोग्राम दा समापन होआ। इस दरान बक्ख-बक्ख थाहरें थमां आए दे प्रतिनिधिएं एहदे च हिस्सा लैता। एहदा मकसद इक दुए दी संस्कृति गी जानना, समझना, एकता ते सांस्कृतिक आदान प्रदान गी बढ़ावा देना हा। इस दरान प्रतिनिधिएं राष्ट्रीय एकता, अखंडता ते हरियाणा ते जम्मू कश्मीर दी संग्रह सांस्कृतिक बन्न सबन्नता गी प्रदर्शित कीता।

<><><><><><>

Rajouri JJM

राजौरी दे डिप्टी कमीशनर अभिषेक शर्मा होरें नौशेहरा च कब्जा रेखा कन्नै लगदे इलाकूँ दा व्यापक दौरा लाया ते जल जीवन मिशन तैहत् चलाए जा'रदे कम्में दा जायजा लैता। अपने दौरे दरान डिप्टी कमीशनर होरें बी.बी.कराली च जल जीवन मिशन स्कीम दे कम्में दा निरीक्षण कीता ते एक्जीक्यूटिव इंजीनियर गी हिदायत कीती जे ओह् कम्में दी रफ्तार गी तेज करन ते इसी तौले थमां तौले चालू करन। डिप्टी कमीशनर होरें मकामी लोकें कन्नै बी गल्ल कीती ते उंदी समस्याएं ते परेशानिएं दा जायजा लैता। उनें सब्बनें गी भरोसा दोआया जे प्रशासन सब्बने गी साफ स्वच्छ पीने आला पानी उपलब्ध करोआने लेई वचनबद्ध ऐ।

<><><><><><>

Khelo India Winter Games

खेलो इंडिया विंटर गेम्स दा दूआ गेड़ अज्ज गुलमर्ग च शुरू होआ। अज्ज पैहले दिन एलप्राइन स्काइंग , नॉडिकस्काइंग, स्काई माउंटेनरिंग ते स्नो बोर्डिंग आलियां प्रतियोगिता होइयां। एह खेड्डां अज्ज शुरू होइयां न ते इस म्हीने दी 12 तरीक तगर जारी रौंहगन।

खेलो इंडिया विंटर गेम्स दा पैह्ला गेड़ जनवरी च लद्दाख च होआ हा। पैहले गेड़ च आईस स्केटिंग ते आईस हाकी जनेह् प्रतियोगिताएं दा सरिस्ता कीता गेआ हा।

<><><><><><>

Cricket

आईसीसी चैंपिन्स ट्रॉफी क्रिकेट दे फाइनल मकाबले च अज्ज दुबई च भारत दा सामना न्यूजीलैंड कन्ने होग। एह् मैच भारतीय समें मताबक दपैहरी ढाई बजे शुरू होग। गौरतलब ऐ जे इस प्रतियोगिता च भारतीय टीम अजें तोड़ी इक बी मैच नेई हारी ते ग्रुप स्टेज च भारती टीम नै न्यूजीलैंड गी 44 रंजें कन्ने हराई दित्ता हा। तोआई न्यूजीलैंड नै बी इक्कै मैच गी छोड़ियै अपने बाकी सारे मकाबलें च जित्त दर्ज कीती ही।

<><><><><><>